

Rendaquint semestril da la BCG 2019:

l'amplificaziun da la banca d'investiziuns sa cumprova. La diversificaziun contribuescha al gudogn.

Cuira, ils 25 da fanadur 2019 – La Banca Chantunala Grischuna (BCG) cuntanscha in fitg bun resultat semestril cun in gudogn dal concern da passa 100 milliuns francs (+1.1%). L'amplificaziun consequenta da la fatschenta d'investiziuns en l'ambient da la bursa actual è stada lucrativa per la banca. Las perspectivas per tut l'onn èn meglras che spetgà.

Las cifras distinctivas:

- gudogn dal concern: CHF 100.5 miu. / +1.1%
- resultat da fatschenta: CHF 103.9 miu. / -1.0%
- afflussiun da novs daners: CHF -32.7 miu. / -0.1%
- creschientscha da las ipotecas: CHF +271.6 miu. / +1.6%
- relaziun da custs e d'entradas I: 44.2%; relaziun da custs e d'entradas II: 47.0%

Ultra da la participaziun existenta a la banca privata Bellerive AG ha la BCG acquistà per il 1. da fanadur 2018 ina maiortad consolidabla da 51% da l'administraziun da la facultad turitgaia Albin Kistler AG. La finamira è anc adina d'amplifitgar la fatschenta d'investiziuns e da cuntinuar a reducir la dependenza da la fatschenta cun differenzas da tschains. «Il svilup strategic da la BCG ad ina banca d'investiziuns relevanta sa manifestescha en il resultat semestril: per l'emprima giada deriva passa in terz dals retgavs da la fatschenta d'investiziuns», declera il president da banca Peter Fanconi. Il CEO Alois Vinzens sa legra da l'ultim resultat semestril, per il qual el è responsabel: «Nus guardain enavos sin in semester pretensius ch'è però tuttina reussi fitg bain. La grevezza dals tschains negativs daventa visibla. Tuttina avain nus pudì augmentar il gudogn dal concern per l'emprima giada en il decurs dad in semester sin passa 100 milliuns francs».

Augmentà il gudogn dal concern sin CHF 100.5 miu.

Il resultat da fatschenta, il resultat operativ dal concern da la BCG, sa chatta en l'emprim semester mo per pauc sut il nivel da l'onn precedent (CHF 103.9 miu. / -1.0%). Il gudogn dal concern s'augmenta per 1.1% sin CHF 100.5 miu. e surpassa per l'emprima giada CHF 100 miu. La banca privata Bellerive AG po mantegnair apaina sia contribuziun al resultat sin il bun nivel da l'onn precedent.

Augmentà la rendita da fatschenta per +5.7%

La rendita da fatschenta (CHF 209.4 miu.) s'augmenta grazia a l'effect da consolidaziun da l'Albin Kistler AG per CHF 11.4 miu. resp. +5.7%. Las consequenzas da la politica da tschains negativs da la Banca naziunala svizra èn pli visiblas en il resultat. Las marschas adina pli stretgas e la curva da la structura da tschains pli platta han per consequenza in resultat net da la fatschenta da tschains per CHF 6.9 miu. pli bass. Ils retgavs supplementars dal gudogn cun la fatschenta da cumissiuns e da servetschs sco era da l'ulteriur gudogn regular han già in effect cumpensant ed han manà a l'augment da la rendita da fatschenta menziunà.

La fatschenta da cumissiuns e da servetschs s'augmenta per +34.9%

Il gudogn da la fatschenta da cumissiuns e da servetschs è s'augmentà pervi da la consolidaziun cumpletta da l'Albin Kistler AG per +34.9% sin CHF 66.6 miu. (CHF +17.2 miu.). La quota da retgav è creschida en consequenza dal grond augment dal retgav sin 32.2% (perioda da l'onn precedent: 25.5%). La valur visada strategica da 30% vegn uschia surpassada per l'emprima giada. L'ulteriur gudogn regular (CHF 10.1 miu. / +28.7%) è s'augmentà en il rom dal svilup da la bursa.

Mantegni la productivitat excellenta: la relaziun da custs e d'entradas I munta a 44.2%

Ils custs da fatschenta (CHF 91.5 miu.) inclus l'indemnisaziun da la garanzia chantunala è creschids en cumparegliaziun cun l'onn precedent per +7.3%. Ils custs supplementars èn d'attribuir a la consolidaziun cumpletta da l'Albin Kistler AG. Las investiziuns en il futur digital da la banca colliadas cun custs da gestiun pli auts han ins pudì cumpensar cumplainamain cun in management da custs strategic. Cun ina relaziun da custs e d'entradas II da 47.0% (+0.5% puncts) ed ina relaziun da custs e d'entradas I da 44.2% (+0.2% puncts) è la BCG vinavant ina da las bancas svizras las pli productivas.

Ils emprests a la clientella creschan sin passa 20 milliardas francs

Il volumen da fatschenta dal concern da la BCG munta a CHF 55.0 mia. Il volumen dals emprests a la clientella è creschi per CHF +354.5 miu. (+1.8%). Ils emprests cuverts cun ipotecas han contribuì a la creschientscha cun CHF +271.6 miu. (+1.6%). La facultad da la clientella è creschida pervi da la performance dal martgà per +5.3% sin CHF 35.0 mia. Il fluss monetar è stà marcà d'ina gestiun pli restrictiva dals deposits dals clients. En l'emprim semester sa preschenta damai in scul da novs daners da CHF -32.7 miu. (-0.1%). Il svilup strategic da la banca d'investiziuns sa manifestescha en il svilup legraivel dal volumen da mandats e da fonds.

Ina dotaziun d'agen chapital surproporziunala

La BCG preschenta cun il resultat semestral 2019 in agen chapital (incl. minoritads) da CHF 2'656.6 miu. Per calcular ils agens meds necessaris applitgescha la banca per l'emprima giada la tariffa dal SA-BIZ. Ensemen cun ulteriuras optimaziuns han ins pudì augmentar la dotaziun d'agen chapital matematica (CET-1) sin 20.1%. La BCG tutga uschia tar ina da las bancas universalas svizras cun la meglra chapitalisaziun. Quai conferma era la Leverage Ratio fitg auta da 9.2%.

Perspectiva 2019: il resultat operativ è meglier che spetgà

Sin fundament da las cifras semestralas auza la BCG sia perspectiva per il 2019. La banca quinta da nov cun in resultat da fatschenta da CHF 185 fin CHF 190 miu. (enfin ussa CHF 175 fin CHF 180 miu.). La finamira da creschientscha areguard ils emprests a la clientella s'augmenta sin CHF +550 miu. (enfin ussa CHF +350 miu.) e quella areguard la facultad dals clients sa reducescha sin CHF +300 miu. (enfin ussa CHF +500 miu.). La reducziun è d'attribuir a l'utilisaziun pli vasta da tschains negativs en connex cun deposits dals clients en la sedia principal.

La persistenza stat en il center dal giubileum

Il 2020 festivescha la BCG ses giubileum da 150 onns. L'onn da giubileum metta la banca accents per l'avegnir cun realisar projects persistents, perquai ch'il Grischun la stat a cor. L'aua, la natira e la persistenza èn en il focus. Sco emprim project da giubileum ha la BCG preschentà il matg il cudesch electronic dals pizs grischuns. Ulteriurs projects suondan en il rom da la conferenza da medias a chaschun da la midada da CEO ils 26 da settember 2019. Infurmaziuns actualas en connex cun il giubileum da la BCG chatt'ins sin gkb2020.ch u en las medias socialas cun il hashtag #gkb2020.

Contact per ils collavuratur da medias e per investurs:

Banca Chantunala Grischuna, Medias & Investor Relations, chascha postala, 7001 Cuir

Thomas Müller, thom.mueller@gkb.ch, telefon +41 81 256 83 11

Plutarch Chiotopulos, plutarch.chiotopulos@gkb.ch, telefon +41 81 256 83 13

La Banca Chantunala Grischuna sin:

gkb.ch/medien | [Twitter](#) | [Facebook](#) | [Instagram](#) | [YouTube](#) | [Flickr](#) | [Xing](#)

Banca Chantunala Grischuna – il leader en il Grischun

La Banca Chantunala Grischuna porscha tut quai ch'i dovra per ina banca universal moderna – per persunas privatas, l'economia ed il maun public. La banca occupa 999 collavuraturas e collavuratur (stadi dals 30-06-2019). En il chantun Grischun cun sias numerusas vals e pliras linguas, è l'interpresa represchentada cun 52 agenturas, la sedia principala sa chatta a Cuir. La Banca Chantunala Grischuna è participada a la Banca Privata Bellerive SA a Turitg ed a la Albin Kistler SA a Turitg. En il rendaquint semestral preschenta ella cun ina summa da bilantscha da CHF 26,6 milliardas in gudogn dal concern da CHF 100,5 milliuns. Il scrit da participaziun BCG è quotà a la bursa dapi ils 10 da settember 1985.

Termins

Quint annual 2019: 7 da favrer 2020

Radunanza dals participants: 25 d'avrigl 2020
